

Berita-berita Ringkas Dari Alam Islami

Kerajaan Pakistan telah mendermakan sebanyak 50,000 rupee kepada perwakilan bantuan dan kerja kebangsaan Palestin sebagai tambahan kepada bantuan tetap tahunan Pakistan 100,000 rupee bagi tahun 1966. Pakistan telah menghadiahkan sebanyak 2,896,700 rupee kerana membantu pelarian-pelarian Palestin sebagai tambahan bantuan gandum yang diberinya.

* * *

Kerajaan Iraq telah bersetuju untuk bekerjasama lebih rapat lagi dengan Turki. Di dalam persetujuan itu kerajaan Turki telah menjual senjata kepada Iraq, kata suatu berita yang dipercayai dari Ankara. Persetujuan itu didapati di dalam rundingan di antara kedua-dua Perdana Menteri kerajaan-kerajaan itu.

* * *

Bekas Presiden Turki, Jalal Bayar¹ yang telah dijatuhkan hukum bunuh – kemudian dihukum seumur hidup oleh Mahkamah Turki telah diampunkan. Pengampunan itu dibuat kerana Jalal Bayar sentiasa uzur. Beliau berumur 84 tahun. Jalal Bayar dijatuhkan hukum bunuh pada bulan September 1961 kerana tuduhan “khianat” sesudah pemberontakan di Turki pada 17 Mei 1960. Hukuman kemudiannya dipinda dengan hukuman penjara seumur hidup. Perdana Menteri dalam masanya, Menderes, telah dihukum bunuh.

* * *

Dr. F. Fuchuk², Naib Yang Dipertua kerajaan Cyprus, telah menghantarkan sepucuk telegram kepada Setiausaha Agung Bangsa-bangsa Bersatu membantah rampasan Greek kepada Masjid Hala Sultan Tekke, yang terletak di dalam makam mak saudara Nabi Umm al-Harām. Orang-orang Turki tidak dibenarkan masuk ke daerah itu dan semua orang-orang Islam tidak dibenarkan masuk ke masjid itu ataupun ke makam bonda saudara Nabi (Umm al-Haram).

* * *

Usaha-usaha sedang dibuat untuk mengeratkan semula hubungan di antara Turki dengan Republik Arab Bersatu. Pusat kebudayaan telah dibuka di Kaherah dan di Ankara kerana mengajar bahasa Arab dan Turki. Turki akan mengakui syahadah Universiti Republik Arab Bersatu dan al-Azhar. Dalam pada itu qari dari Republik Arab Bersatu akan dihantarkan untuk membaca al-Qur’ān di Ankara dan di Istanbul dalam bulan Ramadan kelak. Pertukaran mahaguru-mahaguru, penuntut-penuntut dan pelajar-pelajar akan dijalankan di antara kedua negara itu.

Patut disebut orang-orang di Turki hampir-hampir tidak mengetahui lagi bahasa al-Qur’ān sesudah dihapuskan oleh Kamal Ataturk dan hampir-hampir semua pemuda-pemuda dan orang-orang setengah umur tidak dapat lagi membaca huruf al-Qur’ān.

* * *

“Kita mahu dan bersedia bekerjasama dengan negara-negara Islam kerana maslahat-maslahat yang berfaedah kepada Islam tetapi kita adalah membantah agama Islam dijadikan politik. Kita tidak menyetujui agama di dalam siasah, kerana itu tidak mahu mengambil bahagian di dalam Ikatan Islam, kata Perdana Menteri Iraq, Abd al-Rahman Bazzaz, di Istanbul baharu-baharu ini.

* * *

Parlimen Kebangsaan Republik Arab Bersatu telah mensahkan undang-undang menghukum bunuh penyeludup-penyeludup.

* * *

Derma Masjid Jamik

Berita dari Madrid menyatakan bahawa Jalalah al-Malik al-Mu’azzam Faisal akan menderma wang sebanyak 100 ribu dolar (450 ribu riyal Saudi) untuk membina sebuah masjid jamik yang akan didirikan di kota Madrid. Kerajaan Swiss bersedia menghadiahkan sebidang tanah untuk pembinaan masjid itu.

* * *

Kuwait Menderma Ke Luar Negeri

Kerajaan Kuwait telah menetapkan akan mengeluarkan derma-derma berupa wang tunai kepada persatuan-persatuan pelajar di Amerika, di Kanada dan Eropah. Kepada persatuan alim ulama di Lucknow India, kepada lembaga pengasas madrasah-madrasah Islam di Brazil, kepada markas kebudayaan Islam

¹ Merujuk kepada Celâl Bayar.

² Merujuk kepada Fazıl Küçük.

di Montreal dan juga kepada pengasas Seruan Islam di Surabaya Indonesia.

* * *

Ankara

Pejabat Kementerian Luar Turki telah menyatakan bahawa kerajaan Turki telah menutup beberapa buah pejabat pelancongan Israel di seluruh negeri Turki. Kerajaan mahu bahawa perhubungan dengan negara Israel tidak akan sampai mengganggu kemaslahatannya dengan negara-negara Arab.

* * *

Keruntuhan Akhlak Orang-orang Barat

(Seorang wanita sunti dikirim kepada Beatles di dalam sebuah tong).

Seorang anak dara sunti bernama Carol Derbaden³ berumur 12 tahun, hampir-hampir mati lemas kerana mengurung dirinya di dalam sebuah tong supaya ia dikirim kepada pasukan Beatles di London. Carol telah meminta kepada seorang kawannya mengirimkan peti yang beralamat hadiah kepada Beatles di London – yang ia sendiri berada di dalamnya – dengan jalan post keretapi dengan memakan belanja sebanyak tiga pound sterling. Jauhnya antara kampung Carol dengan kota London ialah 280 batu.

Untunglah sebelum keretapi berangkat salah seorang daripada kuli yang bekerja di stesen itu ternampak kepada sebuah peti di dalam gerabak barang-barang bergoyang-goyang. Ia terus mereportkan perkara itu kepada ketua stesen yang mana pada akhirnya peti itu dibuka

dan mereka dapati Carol sedang bersengokol duduk dengan tak sedarkan dirinya.

Sebenarnya Carol terlupa menebuk lubang kecil untuk udara keluar masuk pada tong itu yang menyebabkan kalau dalam masa setengah jam lagi Carol tidak dijumpai ia akan mati di dalam tong itu.

* * *

Menurut punca-punca Saudi di New York – kerajaan Saudi akan menjemput sebanyak 26 buah negara-negara Islam di dalam beberapa bulan ini kerana menghadiri sidang-sidang tinggi umat Islam yang bakal diadakan di Mekah. Mereka mempercayai bahawa Republik Arab Bersatu dan Suria⁴ tetap akan menolak jemputan itu.

Al-Malik Faisal percaya sekurang-kurangnya 20 negara-negara Islam akan menyertai perjumpaan itu yang akan diadakan pada bulan April tahun hadapan iaitu dalam musim haji.

* * *

Kerajaan Morocco telah menandatangani perjanjian persahabatan dengan kerajaan 'Arabiyyah Sa'udiyyah meliputi kerjasama dalam kebudayaan, maklumat, perniagaan, pelancongan dan perhubungan.

* * *

Setiausaha agung Bangsa-bangsa Bersatu, U Thant percaya penyelesaian Cyprus tidak dapat diadakan dengan tidak ada persetujuan di antara kerajaan-kerajaan Greek dan Turki.

* * *

Menurut pemerhati bahawa kekuatan-kekuatan tentera Arab di Timur Tengah adalah

sebagai berikut:

Republik Arab Bersatu sebanyak 200,000 tentera 450 buah kapal terbang termasuk kapal terbang-kapal terbang besar buatan Soviet, 80 dan 100 buah roket, mempunyai pasukan tank yang besar termasuk 1,000 dan tank pertahanan T45 dan T65 serta T34 tank-tank besar.

Suria mempunyai: 70,000 tentera dan 150 kapal terbang.

Jordan: 40,000 orang tentera dan 36 buah kapal terbang perjuangan.

Iraq: 90,000 tentera dan 250 buah kapal terbang.

Israel mempunyai 250,000 tentera dan mempunyai di antara 450 dengan 470 buah kapal terbang.

* * *

Palestin Beri Amaran

Jawatankuasa Tertinggi Palestin telah memberi amaran kepada Presiden Amerika “bahawa memberi bantuan senjata dan kebendaan kepada Yahudi (Zionis) menjadikan kerajaan Amerika bertanggungjawab atas operasi-operasi yang dilakukan oleh Yahudi dari suatu masa ke suatu masa terhadap negara-negara Arab” perbuatan Amerika itu kata kenyataan itu lagi “tidak bertujuan untuk mengawal keamanan di Timur Tengah ini, tetapi menjadikan Amerika menggunakan kekuatannya untuk membantu dan menggalakkan Yahudi di dalam tujuannya merampas Palestin.”

³ Perkataan sebenar ialah Carol Dryden. Menurut akhbar *Toledo Blade* yang bertarikh 14 Jun 1966, Carol berusia 21 tahun.

⁴ Merujuk kepada Syria.